

Goose-a-Name
Bar & Grill

Live Band

Caribbean Jam

E Ultimo Happy Hour di aña.
For di 8 or.

\$10
Happy Hour
DIAMARS
30 DECEMBER

THE NUMBER 1 HAPPY HOUR IN ARUBA

Gruponan navideo a alegra nos temporada di Pasco

Aña pasa, mi a comenta riba gruponan di gaita di nos isla, y a mostra riba e cambio di melodia di Aguinaldo, Gaita, pa e ritmo crioyo cu tin awendia. Mi a hasta skirbi cu lo por duna e ritmo unico cu nos tin, un number, manera por ehemplo "Arugaldo", combinando e gaita y aguinaldo, hunto cu Aruba, pa mostra riba e autoctono cu e ritmo aki ta.

Lo ta bon pa expertonan riba e materia aki inventa un number pa e ritmo dushi aki cu ta alegra e ambiente di fin di aña rond di nos isla casi den tur cas.

E aña aki mi a rabia hopi atrobe, pasobra na dos ocasion mi a wordo ofreci pa compra CD piratea di gruponan navideo di nos isla.

E gruponan cu ta haci hopi sacrificio y esfuerzo pa yega na un CD ta haya nan mes perhudica cu e pirateria aki, algo cu ta comemi, mirando con hende di mala fe kier haci ganashi riba custia y sacrificio di nos artistanan.

Mi a admira masha hopi cu e aña aki nos a cuminsa bay back pa decada 60 y 70 caminda tabata tin cantidad di grupo navideo y or anota cu mas a lanta e aña aki.

Awendia tur ta wordo yama grupo di gaita, apesar cu mayoria no ta toca ritmo di gaita pero mas bien un mescla entre aguinaldo cu tumba.

Esaki por cierto ta un ritmo masha bunita y pegahoso cu ta autoctono di nos, pasobra e ritmo aki a nace na Aruba y ta aki na Aruba so nos ta toca e ritmo aki.

Den e ambiente aki, di aguinaldo, gaita, gruponan tipico, solistanan casi 20 CD a wordo poni riba plaza y mi ta mira con aña pa aña e ta crece, pa cual mester duna un pabien na e gruponan y solistanan. Pa e temporada aki ta diferente tipo di ritmo tin, entre otro e "gaita tradicional, e paranda, e aguinaldo, e tamborera, e paranda tumba of paranda crioyo autoctono di nos isla."

E aña aki si mi a ripara cuanto cantante tabata tin cu mester rafina nan voz pa wordo yama cantante. Hopi show en bibo y grabacion tabata tin cu bo ta nota e falso cu ta ser canta.

Si scucha emisoranan ora di menciona gruponan favorito etc. tabata manera ta un plan strategico tabata tin traha pa pidi pa bloquea telefon pa cierto gruponan so por haya nan hende pa yama, mientras cu nos Djan mester ta mas critico y no basa solamente riba popularidad di yamada pa peticion, of repeticion di cierto cancion. Por a ripara cu no a controla e mensahenan y evalua e diferente tipo di cancionnan segun di categoria.

E structura di hopi di e composicionnan tabata malo y ta lubida riba e octavonan y e rimamento cu ta di sumo importancia.

Por canta: "Juby a bay su cas" --- "Ami a mire" --- "Den su cas Juby ta baas" --- "tur hende sa di dje".

E ta rima cu cas y baas y cu mire y dje.

Hopi di e cancionnan tin frasenan cu ta termina cu i--o--a--e--u sin cu esakinan ta rima y frasenan cu no ta bisa nada.

ESTILONAN ADMIRABLE DI 2003

Admirable ta cu a haya hopi di e cancionnan aki estilo Gospel, di Adoracion, di Anunciacion di Nacimiento di Hesus y mensahe di Pasco y e paranda crioyo.

Na Venezuela tabata "Un solo pueblo" cu a introduci e paranda crioyo y na Aruba hopi a usa esaki cu topiconan cu no tin di haber cu e fiestanan di temporada di Pasco.

Nos ta papia di "gruponan" di Gaita, mientras cu locual nos tin ta "conhunto" cu tambor, furucu, cuatro, baho, wiri, maraca, campana.

Otronan cu piano (keyboard) cu e piano ta sobresali den forma cu ta "piano-gaita" ta scuchando.

Esunnan moderno tin instrumentonan di blaas, drumset, tambora,

conga, timbal y hasta raspa.

E instrumentonan tradicional di grupo di gaita ta cuarta, maraca, tambor, furucu y wiri (crioyo).

Grupo di gaita ta manera tabata rezona den decada 60 y 70 cu "Los Caminantes", "Estrellas del Bario" cu Doodle Sophia, "Estrellas del Norte", "Trupialen" cu Edwin Abath cu nan grupo di gaita, y no por laga afo tampoco "Los Paranderos" cu Oscar Vidal, entre otro. E dos personanan aki tabata tin nan marca e aña aki un biaha mas riba e temporada aki, como artista di grabacion y tambe activamente cu un of otro grupo como musico invitado. Doodle Sophia mas bien a marca e temporada y no ta pornada e ta ser yama "tata di Gaita" na Aruba.

DOODLE SOPHIA "TATA DI GAITA NA ARUBA"

Mi a perde masha hopi tempo ultimo dianan pa saca afor kico Doodle a haci entre otro durante e temporada, mirando cu su number tabata tin dilanti continuamente den e ambiente di fin di aña.

Directo of indirectamente e tabata tin su man hinca den mayoria di gruponan.

--- E ta fundador y director musical di "Grupo Fortaleza".

--- E tin composicion riba e CD di "Edjean Semeleer" y e ta cuartista riba e CD aki.

--- E ta cuartista riba e CD di "Originales y Punto" y tambe tin composicion riba nan Cdnan. E cuartista di Originales ta un alumno di cuarta di Doodle Sophia.

--- Dos cuartistanan di "Sensacionales" tambe ta alumnonan di cuarta di Doodle Sophia.

--- E fundador, cuartista y director musical di "Banda la Paranda", Roland Jansen tambe a caba curso avanza di cuarta cu Doodle.

--- Doodle ta cuartista riba e CD di "Grupo di Betico" y e ta cuartista tambe riba CD di "M.A. Gaita"

--- Tin musico percusionista den "Paranda ta nos" cu tambe ta alumno actual di Doodle.

--- Riba e CD di "Centro di Bario Tanki Leendert" Doodle ta aparece tambe como cuartista y percusionista.

--- Riba CD di Chanella, Doodle ta cuartista y percusionista.

--- Varios "Jingle" di diferente programa di Pasco na emisoranan tin Doodle tocando cuarta atrobe.

--- E CD nan cu studionan di grabacion ta saca, tin Doodle como cuartista y percusionista (I.Q. Music Lab y Studio Roy Croes p.e.)

--- Na television mi a mira Grupo Tipico Macuarima cu varios alumno di Doodle den nan.

--- E produccion di Quincy Hasham, tambe tin Doodle riba cuerde y percusion, y e cuartista di "Arco Iris", Nelson Oduber, tambe ta alumno di Doodle.

Esaki ta djis pa menciona algun, ya cu ainda tin mas.

Durante aña tambe, e ta maestro di musica di cantidad di mucha y adulto y e ta biba di studio pa studio haciendo trabaonan musical di tur indole.

Doodle ta compositor, cantante, percusionista y ta domina tur instrumento di cuerde, y sin duda e ta e homber mas involvi di un manera of otro den henter ambiente di fin di aña na Aruba.

Pa mi, Doodle merece un reconocimiento e merece un premio pasobra su participacionnan ta di hopi calidad y valor. E ta un musico mayor y di hopi balor pa nos isla.

Te ainda mi no a scucha un cuartista na Aruba, cu por toca e cuarta ey manera cu Doodle ta toca e instrumento aki. Pa esaki un pabien na Doodle y su famia ta na su lugar sigur.

Pa fin di aña, mi lo sigui toca mi radio.

Juby Naar.